

1. august 2004

UKA 2004/25

**Aningaasarsianit akileraarutit pillugit Inatsisartut inatsisaata  
allangortinneqarneranik Inatsisartut inatsisaannut siunnersuut.**  
(Aningaasaqarnermut nunanullu allanut Naalakkersuisoq)

**Saqqummiussissut**  
(Aningaasaqarnermut nunanullu allanut Naalakkersuisoq)

**Siullermeerneqarnera**

Naalakkersuisut sinnerlugit matumuuna saqqummiutissavara aningaasarsianit akileraarutit pillugit Inatsisartut inatsisaata allangortinneqarneranik siunnersuut.

Siunnersuut manna akileraartarnikkut allaffeqarfeqarnerup pitsanngorsarneqarnissaanik innuttaasullu inatsisitigut illersugaanerisa annertusarneqarnissaanik siunertaqarnerusoq akileraartarnermik aaqqissuusseqqinnissamik Naalakkersuisut 2004-mi upernaakkut aallartitaannik, aammalu Inatsisartut inummut ilanngaatiq ilanngaatillu aalajangersimasup aammalu kommunitut ataatsimut akileraarusiissutip qaffanneqarnissaannik akuersissuteqarfigisaannik nangitsineruvoq.

Kommuniti kommissionit akileraarusiisartut ukiut ingerlanerini pingaaruteqarluartumik suliaqarsimapput, ilaatigulli teknikkikkut ineriartornerup kingunerisaanik paasissutissat nalunaarutigineqartut akileraaruseriffinnit pilertortumik misissorneqarsinnaalersimapput, taamaattumillu kommissionit akileraarusiisartut akileraarusiinerimi maanna pisariaarussimmata atorunnaarsinneqarnissaat siunnersuutaavoq.

Akileraarusiinerup kukkunersiunerullu pitsaasuunissaat qulakkeerniarlugu siunnersuutaavoq suliaq taanna Skatterådip ukiumoortumik pilersaarussiaa, sumiiffinni ataasiakkaani kommunalbestyrelsit qullersaallutik akisussaaffigisassaata naapertorlugu ingerlanneqartalissasoq. Tamanna ima isumaqanngilaq kommunalbestyrelsit suliaqarsinut ataasiakkaanut akuliuttassasut. Taakkununga akisussaasuusaaq inuk, akileraaruseriffiup akileraarusiinerimik kukkunersiunerimillu suliaqarnerani qullersaalluni akisussaasuusussatut kommunalbestyrelsimit toqqarneqarsimasoq.

Aamma akileraaruseriffiit pitsanngorsarneqarnissaannik anguniagaq kommunit akileraaruseriffikkoortumik kommunitinik allanik imaluunniit Akileraartarnermut Pisortaqarfimmik suleqateqarsinnaanerannik periarfissiissuteqarnikkut anguniarneqarpoq.

Naalackersuisut isumaqarluinnarput suleqatigiinnissamut periarfissat taakku kommuninit atorluarneqassasut, akileraaruserinermimi ilisimasanik amerlisitsillutillu annertusaassammata, tassungalu ilutigitillugu aamma pitsaassuseq annertunerulissalluni. Aamma isertitassanik qulakkeerinissaq pisariaqartoq eqqaamaneqassaaq. Naalackersuisut isumaqarput suleqatigiinnissamut aaqqissuussinerit taakku tamakkiisumik atorneqanngippata tamanna pillugu toqqaannartumik inatsisiliortoqartariaqartoq.

Suliassat pilertornerusumik suliarineqarnissaat siunertaralugu aammattaaq siunnersuutigineqarpoq kommunini akileraaruseriffiit paasissutissanik nutaanik saqqummertoqartillugu akileraarutissanik angissusiliinermik, piffissap akileraarusiiffiusup qaangiunnerata kingorna ukioq ataaseq tikillugu sivissuseqartumi allanngortitsisinnaassasut, tassa Skatterådimit piginnaatinneqarnissamik qinnuteqaqqaanngikkaluarlutik, soorluttaaq aamma akileraarutissanik angissusiliinerup kukkusuunera ersarissuuppat akileraaruseriffiup angissusiliinermik allanngortitsisinnaanissaa Skatterådip naammagittaalliummik suliaqarnerminut atatillugu piginnaatitsissutigisinnaassagaa.

Digitaliusumik ingerlanerup periarfissiinera pisortat ingerlatsinerannik pitsanngorsaannissamut annertuunik periarfissiissaaq. Taamaattumik akileraaruseriffiit, Skatterådip aamma Akileraartarnermut Pisorta qarfiup, pisuni periarfissap taassuma atorneqarnissaa innuttaasumit pineqartumit akuerineqarsimatillugu digital atorlugu attaveqartarnissaannut Naalackersuisut akileraartarnerup iluani malittarisassiuussinissamut piginnaatinneqarnissaat siunnersuutigineqarpoq.

Innuttaasut inatsisitigut illersugaanerat annertusarniarlugu siunnersuutigineqarpoq naammagittaalliortarnerup ingerlanneqartarnera sivikillisinneqassasoq, tassa kommunini akileraaruseriffiit aalajangiinermi Skatterådimit Kalaallit Nunaata Eqqartuussivianut ingerlateqqinneqarsinnaasunik aalajangiisartumut ingerlaannaq naammagittaalliuutigineqarsinnaalersillugit, soorluttaaq Skatterådimit naammagittaalliuut ukiup ataatsip qaangiutinnginnerani rådimit aalajangiiffigineqarsimanngitsoq, Skatterådip aalajangiinissaa utaqeqqaanngikkaluarlugu Kalaallit Nunaata Eqqartuussivianut suliassanngortinneqarsinnaalissasoq. Taamaaliornikkut innuttaasut akileraarutiminnut tunngatillugu suliassaatinermik maannakkornit pilertornerungaartumik aalajangiiffigititsisaleqarnissaat Naalackersuisunit naatsorsuutigineqarpoq.

Innuttaasut atuinnermut periarfissaat pitsaanerusumik naleqqiussinnaajumallugit kiisalu isumaginninnikkut tapiissutinik, soorlu ineqarnermut tapiissutinik, meeqqanut tapiissutinik il.il. tunineqarnissamut naatsorsuinnermi tunngavissat naapertuuttuunerunissaat qulakkeerumallugu Naalackersuisut siunnersuutigaat annertussusilerikkamik ikiorsiissutit pisariaqartitsinerlu naapertorlugu tunngaviusumik tunniunneqartartut aningaasarsiat akileraaruteqaataasussat naatsorsorneqarneranni ilanngunneqartarnissaat.

Aammami annertussusilerikkamik ikiorsiissutit pisariaqartitsinerlu naapertorlugu ikiorsiissutit isumaginninnermi ikiorsiissutit allat aningaasarsianut akileraaruteqaataasussanut ilaareersut, soorlu utoqqalilluni siusinaartumillu soraarnerussutisiat, sungiusaqqinneqarnermi sulinngiffeqarnermilu tapiissutit kiisalu ilinniagaqarnerisutit, assigalugit pineqalissapput.

Annertussusilerikkamik ikiorsiissutinik pisariaqartitsinerlu naapertorlugu ikiorsiissutinik pissarsisartut aningaasarsiaasa atorsinnaasaasa annertuumik appariaateqarnissaat Naalakkersuisut siunertarinngimmassuk aammattaaq Naalakkersuisut ukiaanerani ataatsimiinnermi matumani siunnersuuteqarput annertussusilerikkamik ikiorsiissutit aningaasarsiat minnerpaaffissaasa 90 procentiisut annertussuseqalersillugit qaffanneqassasut, kiisalu pisariaqartitsineq naapertorlugu ikiorsiissutit akileraarutinut akileraarnissamik kinguneqartassanngitsut, tassa akileraarutissat tamarmiusut isertitap taassuma akileraarutitaasut annertutigisunik appartinnerisigut.

Aammattaaq kinguaariit nikinneri oqilisaassiffiugumallugit iluanaarutisianik akileraarusiisarnerup arlalitsigut teknikkikkut allannguuteqarnissaa Naalakkersuisut siunnersuutigaat, tassa siunnersuutigineqarmat kinguaariit nikinnissaannut atatillugu aningaasaatinik appartitsisoqartillugu aningaasaatinik agguaassinermi iluanaarutisiat nikingassutaannik akileraarusiisoqartalernissaa. Tamatuma aamma selskabit sulisorisamik aktiaataannik tuniniaqqitassatut utertitsillutik pisineranni kiisalu selskabit aningaasanik niuerfinni nalunaarsortissimasut nammineq aktiaatiminnik utertitsillutik pisineranni atuuttarnissaa siunnersuutaavoq.

Kiisalu iluanaarniarloqarnissaa pinngitsoortinniarlugu Naalakkersuisut siunnersuutigaat, iluanaarutisiat nikingassutaannik akileraarusiisarneq aamma atuutissasoq selskabip atorunnaarsinnerani iluanaarutinut, tassa selskabimi tassani aktianik amerlanerpaanik piginnittuusoq pigisanik selskabimut allamut aamma aktianik amerlanerpaanik piginnittuuffigisaminut tunisaqarsimatillugu.

Teknikkikkut allannguutinut taakkununnga tunngatillugu aammattaaq innersuussutigissavakka siunnersuummut oqaaseqaatit.

Taamatut oqaaseqarlunga aningaasarsianit akileraarutit pillugit Inatsisartut inatsisaata allanngortinneqarneranik siunnersuut Naalakkersuisut sinnerlugit Inatsisartunut suliassanngortippara, aammalu Akileraartarnermut Akitsuutinullu ataatsimiititaliamit suliarineqareerpat aappassaaniigassanngortillugu.